

Durante ultimo 25 añanan:

Monseñor Ellis a mira hopi cambio den nos comunidad

ORANJESTAD (AAN) -- Den e transcurso di e 45 añanan di bida Sacerdotal di Monseñor Ellis, y specialmente durante su 25 añanan como Obispo di Willemstad, a surgi un cambio grandi den Clero y e religiosanan, pasobra e clero y soernan Hulandes casi tur a bay bek pa motibo di nan edad.

Pa loke ta trata e comunidad di Aruba tambe a bin un cambio grandi den e sistema di bida y mentalidad, door di desaroyo di turismo.

LAICONAN A TUMA OVER...

"E islanan aki a keda un poco bashi y debi cu tin

poco sacerdote y religiosa Antiyano y Arubiano nos mester a busca nan na otro paisnan", Monseñor Ellis a menciona.

Afortunadamente mayoria di nan ta worde acepta hopi bon pa pueblo y nan ta adapta facil na nos cultura y idioma.

Monseñor ta señala, cu e Laiconan mester a tuma e trabao over, y na diferencia di frere y soernan, pa maestro y enfermeranan e trabao ta mas difícil pasobra nan tin tambe e preocupacion y trabao den nan hogar, y pesey nan tin su admiracion.

CU DESAROYO DI TURISMO

Monseñor Ellis tambe a

señala cambionan cu a surgi den e comunidad di Aruba, door di desaroyo di turismo. "Prome cu turismo a cuminsa hopi homber tabata traha na Lago como obrero, y famianan tabata biba humilde, sin luho.

E tempo cu mi a biba na Santa Cruz apenas tabata tin luz electrico, y tur hende tabata bay drumi tempran, di 8 pa 9'or di anochi caba. Tabata un bida simple, sano y e hendenan tabata hopi religioso tambe", Monseñor a bisa.

El agrega cu algo cu e tabata aprecia di muchanan homber Arubiano ta cu ningun tabata casa sin traha su mes cas, y amigo y famianan tabata yuda otro traha e cas. "Awendia mi ta mira cu hopi hende ta materialista, turismo a bin reemplaza e bida den cunucu, planta maishi, bonchi, etc, y agricultura a caba na nada.

Turismo a trece placa pero tambe a pone cu bida di famia a bay hopi atras debi cu

ambos mayor tin cu traha, tin biaha ora e tata ta bin mainta di trabao e mama ta sali bay traha, y e muchanan ta haya menos atencion.

No kere cu e cosnan material ta trece felicidad. Ta Amor y comprension ta trece felicidad. Amor taifica duna, y sa duna di nos mes", el a agrega.

Monseñor tin un expresion na Ingles cu semper e ta bisa tur pareha: "Family that prays together stays together".

Pesey pa bolbe na e balornan di antes e ta desea pa tur famia na Aruba sinta reza hunto pa permanece uni.

Otro aspecto cu Monseñor a señala, dentro di e cambionan cu el a mira durante e ultimo 25 añanan, ta cu antes cu no tabata tin tanto diversidad di credo manera tin aworaki.

MILENIO NOBO

Relaciona cu Milenio nobo Monseñor ta muestra su mes

hopi optimista.

"Mi kier sigui e ehemplo di nos Papa Juan Pablo-II cu ta mira año 2000 cu hopi ilusion. E ta bisa cu mester ta un primavera nobo. E ta papia di Evangelizacion nobo. Nos tur mester gradici Dios 2000 año cu El a bin na mundo y cu nos mester trata di cambia nos mundo. Pa mas cu e ta sinti'e malo y cu su edad ta hopi halto pero e kier dreña hunto cu nos na Año 2000", Monseñor a expresa.

DESEO HOPI SPECIAL

Monseñor Ellis tin aworaki 72 año di edad y cu 75 año e mester retira como Obispo. Un deseo hopi special cu e tin ta cu aki 3 año haya un bon sucesor cu ohala sea Arubano of Antiyano.

Ademas, cu lo bin famianan mas religioso y uni na Antiyas y Aruba, pasobra di eynan e vocacion pa mas Sacerdote mester sali.

ATV cu programa special dedica na Monseñor Willem Michael Ellis

ORANJESTAD(AAN): Diamars awor dia 25 di november, Monseñor Willem Ellis ta celebra 25 anja cu ela keda nombra como obispo. Esaki ta nifica cu ta hopi generacion a conoce nos obispo y a biba hunto cune. Obispo ta conta di e tempo cu tawata tin hopi sur na aruba y tambe di awor cu

tempo a cambia y ja no tin hopi sur mas. Esun cu ta na aruba ta corda e 25 anjanan di obispo y ta conta su experiencia cu obispo Ellis. Den e temporada aki di anja, nos ta custuma di tin bishita di obispo pa confirma e muchanan catolico. E anja aki fuera di ta na aruba pa confirma e muchanan,

obispo ta na aruba pa celebra di 5 lustro di ta obispo pa antiyas y aruba. Pa e motibo ey tambe diadomingo awor den un momento di reflexión nos lo cuminsa mas trempan, esta pa 9'or y mei di mainta, cu un momento special di reflexión unda monseigneur ta conta un

poco kiko tur e anjanan aki ta nifica pe. Tambe por apreciar imagennan di e misa cu obispo a participa na dje di 7 pater riba plaza Betico y momentonan special di e santo sacrificio di misa special cu a wordo celebra dia di patrono di san fransisco. Biblioteca nacional a

suministra atv potret cu sigur lo pone nos mayoran corda obispo for di su prome anjanan como obispo, mescos cu e bishita serca papa di roma. E anja aki dia 10 di oktober, monseñor Ellis a cumpli 72 anja y dia 24 di oktober a celebra e hecho cu 45 anja pasa ela bira sacerdote. Diadomingo awor,

pa 10'or, obispo lo ta hunto cu nos tambe den un momento di reflexión for di parokia di brazil, unda na mes momento lo celebra dia di patrono cristo rey. Pa medio di esaki tambe atv t. felicita monseñor Willem Michael Ellis y ta desea obispo hopi anja mas hunto cu nos.

Diadomingo awor:

Monseñor Willem Ellis ta celebra 45 año di bida Sacerdotal



ORANJESTAD (AAN)--Diadomingo 22 di november awor, Monseñor Ellis (Obispo di Willemstad) ta celebra su 45 añanan di bida sacerdotal. Un trayectoria cu e ta defini como pleno y feliz, pero logicamente cu su "ups & downs".

Den entrevista cu DIARIO, nos apreciado Obispo a elabora riba su vocacion y trabao dedica na Dios.

El a nace dia 10 di october di 1926, y su nomber di pila ta Willem Michel Ellis, yiu di Joseph Marie Jan Ellis y Maria Sibila Ellis- Bartels (di feliz memoria).

Di mucha, Willem Michel, a bay Colegio Santo Tomas unda el a caba su MULO. Di aki el a bay Medellin, Colombia, unda el a ingresa na Seminario Menor y Mayor, pa ordena como Sacerdote. Esaki a sosode entre e añanan 1943 (den tempo di guera) y 1953.

VOCACION TA BIN DI FAMILIA

Monseñor Ellis su vocacion pa bira sacerdote a manifesta su mes durante su infancia. Na ki momento? Monseñor a conta nos lo siguiente: "Tempo cu mi tabata na 9de klas, Frater a bisa nos: -otro año ta año di examen, kico boso ta bay haci?- pero ningun di nos tabata sa ainda kico nos kier bira den futuro.

Anto Frater a bisa nos cu nos ta bay reza tur dia un oracion pa nos conoce nos vocacion, pues, kico Dios kier di nos.

Na cas mi a conta mi mayornan y nan a bisa mi cu na cas nos tambe ta bay reza, despues di e rosario anochi, un oracion pa conoce mi vocacion. Poco tempo despues mi a sinti e deseo di bira sacerdote".

Monseñor a comenta cu den su famia e tabata tin un omo, ruman di su tata y un primo, sobrino di su mama, cu tabata sacerdote. Ademas dos tanta (ruman di su tata) tabata soer. Tambe su mama tabata tin dos tio sacerdote, loke ta nifica cu e vocacion pa sirbi Dios ta den e vena familiar mes.

UN MUCHA NORMAL

E hecho cu Monseñor Ellis a sinti e vocacion pa bira sacerdote no ta nifica cu e tabata un mucha keto keto. "Mi tabata un mucha normal, pero cu a sufri hopi pasobra mi no a conoce mi mama. El a fayece tempo mi tabata tin 9 dia di naci. Mi tata a casa cu un ruman di mama ken tambe a bay lagami cu mi 12 año di edad. Mi tabata un mucha inquieto y travieso manera tur mucha, y hasta mi a haya sutu na cas y na school", Monseñor a hari ora el a conta nos esaki.

ORDENACION SACERDOTAL

Na año 1948 Monseñor Ellis a haya "tonsura". Esey ta e pela rondo cu antes e pastor nan tabata haya como señal di consagracion na Dios, y el a ordena como sacerdote y bisti su sotana. E prome parokia den cual

Monseñor a sirbi ta Iglesia Immaculada Concepcion di Santa Cruz.

"Mi a sirbi na Parokia di Santa Cruz dos año y despues Monseñor Zeppenfeld a manda mi bay Curacao bek.

Mi a bolbe Aruba mi pa sirbi un par di luna na Parokia di Brazil, y despues di esey mi a keda den diferente Misa na Curacao. Esun unda mi a sirbi mas año ta e Parokia di Coromoto na Mundo Nobo, unda mi a keda diez año", Monseñor a relata.

E ta corda cu prome cune ta Pastor Romer a ordena como Sacerdote, esta, 7 año prome, y despues di djé ta Pader Ruddy Josepha. Y te ainda, no tin suficiente sacerdote Antiyano ni Arubano loke ta haci necesario busca pastornan den exterior.

25 AÑA COMO OBISPO

Binti año despues cu Monseñor Ellis a bira sacerdote el a worde nombra como Obispo di Willemstad cu ta e titulo oficial aunke e ta Obispo di Antiyas y Aruba.

El a relata: "dia 26 di november awor mi ta cumpli 25 año como Obispo di Willemstad. Mi tarea como Obispo ta nifica traha "brug" entre tur parokia di Antiyas y Aruba y nan sacerdotenan. Antes mi tabata bay bini di Curacao pa Aruba pero despues mi a dicidi di dedica tur año e luna di November pa bin Aruba".

CELEBRACION

Diadomingo awor cu ta dia di Cristo Rey lo celebra e 45 añanan di bida sacerdotal di Monseñor Ellis cu dos Santo Sacrificio di Misa na Iglesia Cristo Rey di Brazil. E prome lo ta mainta pa 9'or y di dos ta pa 7'or di anochi. Mainta lo tin Confirmacion y lo yama Dios Danki pa 25 año como Obispo y 45 año como Sacerdote.

Na Curacao lo celebra e aniversario aki riba dia 8 di december cu ta Fiesta di Immaculada Concepcion, patron di e Diocesis di Antiyas y Aruba.

Anochi lo tin Santo Sacrificio di Misa na aire liber na Pietermaai (banda di e Catedral) cu representacion di diferente parokia, algun Obispo invita, amigo y un ke otro ex-compañero di Seminario di Monseñor. Den otro articulo por lesa mas tocante e entrevista cu Monseñor Ellis.